Et in letere di sier Vetor Lipomano, di 10, vidi. Come ebe la letera li fo scrita di 5 et 6, con li avisi de i nimici, la qual tuta Roma la volse veder. Tutti stava in aspectation che la vitoria siegna. Il Papa sta bene. El cardinal Bibiena, Santa Maria in Portico, ha di la febre e non poca. L'orator Foscari è stà dal Papa a tuor licentia, parte da matina. È zonti a Civitavecchia 300 spagnoli vien di campo, voleno passar in Spagna, sono cargi di ducati hanno vadagnato ben.

Item, per letere di 11, hore 3 di note. Come era venuta a hore ..., una stafeta al cardinal di Ferara, dil duca di Ferrara, per la qual li advisava il campo nostro era stà roto, e benchè pochi el sapia, pur lui l'ha inteso. Cosa inaspetata, e tuta Roma, excepto pochi, credeva i nimici fusseno roti e il vicerè e il signor Prospero menati prexoni a Venecia, et desideravano cussì fosse per liberar una volta Italia da barbari. Ora mò è venuto il contrario. Avisa, eri el signor Alberto da Carpi e l'orator yspano fono dal Papa con desegni in mano, et erano di mala voia. Ora mò ancora non era zonta la letera di la Signoria a l'orator con l'aviso de questo.

Da poi disnar fo Colegio di la Signoria e savii e Cai di X, et steteno fin hore do di note suso a consultar di danari.

In questa terra è domino Thadio da la Motella citadin bressan, quai non fa più el mestier di le arme, fo nostro condutier, avia 260 cavali, ora suo fiol Marco Antonio fa il mestier, et ha lanze . . . . , et è stà in questa rota. *Tamen* è zonto a Padoa, senza danno di la sua persona. Or questo dimandò a la Signoria alcune eosse, et fo expedito.

Etiam è, come ha ditto, il conte Hugo di Pepoli capo di sguadra dil signor governator, qual scapolò di inimici. Et il canzelier dil signor governador domino Camilo Perusino è ogni di da li savii, dimanda l'avanzo dil suo patron, che dize li avanza 3 bolete, acciò possi con questi danari refar la compagnia, che di 200 homeni d'arme l'avia non par siano scapolati fin qui e venuti a Trevisio 102; ha etiam do soi nepoti presoni, videlicet signor Francesco Datoli et Otavian Signorelli. Et è zonti a Treviso Baldisera Signorelli et Galeazo Bajon pur nepoti dil prefato governador, quali veneno scapoladi.

A dì 16, domenega. Vene in Colegio sier Carlo Miani qu. sier Anzolo stato castelan in la Capella di Bergamo, dicendo è anni 4 che serve questo Stado sperando vegnir con vitoria, e intrò in la Capella con grande animo avanti il provedador Mosto, e lì steva con Hironimo Tartaro contestabele con 100

fanti. Poi preso Bergamo, il provedador Mosto introe, e da 24 zugno fin hora a di . . . Septembrio il campo de i nimici li è stà atorno, non sempre il campo, ma erano asediali, ita che non aveano vin nì pan, et era stà fato cave per aver la roca ad ogni modo, e parse a li fanti di rendersi a descrition, e cussì fo dà taia in tutto ducati 400, qual il provedador Mosto li dete, e hanno perso la roba, etc. Or disse è più pronto che mai, et ha 25 balestrieri in ordine per andar a servir la Signoria nostra volendo. Et il Principe comesse a li savii vedesseno.

Di Padoa, di rectori e provedadori zenerali, di hore 3 di note. Come atendeno a pagar fanti, et si atende a lavorar il bastion di la Saracinesca, fin zorni 4 sarà in fortezza. Li zentilomeni è partiti tutti; i nimici sono a Vicenza; il vicerè e il signor Prospero andono a Verona a consultar de agendis con il Curzenze. Hanno letere di Ruigo qual mandano a la Signoria, come a San Felixe e la Mirandola e de li via si fa fanti a furia, e si dice omnino voleno venir a tuor la impresa di Padoa. Ergo si provedi.

Dil capitanio zeneral, una letera di credenza. Come el manda qui el suo Martino . . . . . . . . . El qual Martin venuto in Colegio, disse come il signor capitanio atendeva a le fortification, ma non era obedito; li rettori e provedadori non li fanno aver le opere come bisogneria, sichè si provedi che si possi ultimar le fabriche. Poi disse di condur alcuni novi condutieri iusta l'aricordo suo, etc. El Principe li usò bone parole, e dito a li savii consultasse.

È da saper, in le letere di Padoa è dil zonzer eri il capitanio Caravaial, voleva andar a Vizenza prometendo mandar la scritura fece il governador di ritornar con una carta di liberation per aver lui contracambio; et consultato, parse il meglio mandarla a tuor, e cussi l'hanno mandata a tuor con letere di esso Caravagial, et è stà mandà uno trombeta.

Di Padoa, vidi sier Francesco Corner, di sier Zorzi procurator, venuto eri sera.

Di Treviso, fo letere dil podestà e provedadori, di eri. Come atendevano a pagar fanti, hanno da zercha 1000 e più pagati e boni. Item, tuti li zentilhomeni è venuti via, videlicet questi:

Sier Zuan Moro qu. sier Damian,
Sier Vetor Barbarigo qu. sier Nicolò,
Sier Jacomo Manolesso qu. sier Orsato,
Sier Anzolo Guoro qu. sier Hironimo,
Sier Jacomo Michiel qu. sier Biaxio,
e altri, i quali erano però a loro spexe andati a cu-

122